



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :

Tir Yimiyim

tiryimiyim@aolima

tir yimiyim

TAPAK 10

Vaccine magütsüetra Health Minister-i anentsü asü ?

Terepranger medeni Tokyo Olympics asayatsü akok: Seiko Hashimoto



VOL. XVIII NO. 196 (ADOK 196) DIMAPUR

KÜPTOKNÜ (SATURDAY)

MONUPII (MAY) 01, 2021

₹ 5.00

## Nagaland nung oxygen plant 3 indang osettem tongogo



**Dimapur, April 30 (TYO):** Nagaland nem lemzüksüba Pressure Swing Adsorption, PSA Oxygen Generation Plant indang osettem tanü Dimapur tonga bener aruogo.

Naga Hospital Authority Kohima aser Dimapur o Mokokchung District Hospital tem nung yanglutsüba oxygen plant indang osettem tanü Dimapur Airport tongogo, ta Health & Family Welfare Minister, S Pangnyu Phom-i metetdaksü.

Paisa Indian Air Force dang tayimtsü ajanga osettem bentsür aruba atema pelaba metetdaksü.

Külen, Chief Minister Neiphiu Rio-ia Union Defence Minister Rajnath Singh dang pelaba metetdaksüogo.

Iba ajanga COVID agi shirangertem nem oxygen supply maneni agütsüetetsü, ta CM Rio-ia ashi.

April 28, 2021 nü pai Union Minister Rajnath Singh dang oxygen plants atema osettem

tayimtsü ajanga bener arutsü atema mepishia liasü.

Chandigarh nung aliba Airforce station Palam Technical area Tarmac nungi special IL 76 tayimtsü nung osettem enoker apusoba sülen tanü nikongdang 3:45 ako meta Dimapur airport tonga arua liasü.

Tanü bener aruba osettemji Kohima, Dimapur aser Mokokchung-i bener apusogo aser tekaratiba nung amenoktsü.

Indian Air Force-i yaküm küm COVID wara mapang Nagaland state-i special mission 12 ben inyaka liasü. Iba mapang parnoki C17 Globemaster, C130 Hercules IL 76, AN 32 Dornier tayimtsütem amshi aser Mumbai nungi BSL lab bener arutsü.

Nagaland state sorkari Dimapur nung aliba project office (IAF) Nagaland, HQ EAC Shillong, Air Hq Vayu Bhavan, MoD, state Nodal officers aser DRC New Delhi nung dang pelaba metetdaksüogo.

## NSF Tir inyaksü atema Kegwayhun Tep shim

**Kohima, April 30 (TYO):** Naga Students' Federation (NSF) nung 2021 nungi 2023 tashi Tir inyaksü atema Kegwayhun Tep shimogo.

Tep ya NSF secretary education inyaka liasü aser pai ya Rengma Students' Union (RSU) nungi lir.

Tanü nikongdang Naga Solidarity Park nung NSF indang 29 buba lokti mungdang nung Chief Election Commissioner K. Elu Ndong-i NSF ketdangpur tasen shimba osang metetdaksü.

**Ketdangpurtem:** Vice president- Atokiho Sümi (Sumi Kiphimi Kuqhakulu), General Secretary- Siipuni Ng

Philo (Poumai Naga Tsüdoumai Me), Social & Cultural Secretary- Benjong Longchar (Ao Kaketshir Mungdang (AKM), Education Secretary- Medovi Rhi (Chakhesang Students' Union), Information & Publicity Secretary- Intesuiding Zeliang (All Zeliangrong Students' Union), Games & Sports Secretary- Kaisü Chakre (Mao Students' Union), Speaker- James Kashung (Tangkhu Katamnao Saklong).

Ketdangpur tasentem indang mezüngbuba Assembly mapang NSF ketdangpur menden tazüng 8 atema nübotem shimtsü, ta K. Elu Ndong-isa metetdaksü.

## Nagaland State Level War Room züngsemtem shimshir

**Dimapur, April 30 (TYO):** Nagaland State Level War Room on COVID-19 maparen inyaksü tenzüksüshio.

Iba nung mendenji Chief Secretary & State Executive Committee, Nagaland State Disaster Management Authority, (NSDMA) Chairperson

lir aser line department balala nungi züngsemtem dena lir.

State Level War Room-i Nagaland nung COVID-19 anema inyakba maparen ketdangsütsü aser mapang shitak nung osang tejangja lemsatepa COVID-19 aziüktsü merangtsü. (Maneni tapak 10 nung...)

## India sorkari Naga Wako aser Temzüng magizüker: Minister Tongpang Ozukum

**Kohima, April 30 (TYO):** Centre sorkari Wako aser Temzüng dak alaka Naga yimten tebilemstü dak sendakba onük ajak angatetepogo, ta Housing & Mechanical Minister, Tongpang Ozukum-i ashi.

Tanü Naga Solidarity Park nung Naga Students' Federation (NSF) indang 29 buba lokti mungdang nung o jembidang Minister aser taoba NSF Tir Tongpang Ozukum-i iba osang metetdaksü.

March 18 nü Delhi nung Chief Minister Neiphiu Rio aser Opposition Leader T R Zeliang nati anir Nagaland MLA tem den senden amendang Union Home Minister Amit Shah-i Wako aser Temzüng dak alaka tanga onük ajak angatetepogo ta ashi.

"Naga nungeri sorkar office tem, quarter aser tongtipang sorkar sentongtem dak alaka

tanga tesemtem nung Wako amshitettsü. Naga wako atsüketsü atema pa dang jaokra, pai atsüketsü ta Amit Shah-i onok dang ashi" ta Minister Tongpang-i metetdaksü.

Ajisüaka, tang atemabo Naga nunger indang temzüng balaka mayutsü ta India sorkari ashiba Amit Shah-isa nenshia metetdaksü.

"India sorkari collective leadership dang tebilemba tasen ka shidangogo aser parnok nungi telangzüba tajung angutsü imlar ta Amit Shah-i ashi. Ajisüaka, onoki tasüngji collective leadership den ajurutepdang, parnoki India sorkari tebilemba tasen lemsatepba atema Wako o Temzüng atema o memelenshitsü ta telangzüba agütsüba ashi" ta Tongpang-isa metetdaksü.

"Iba tebilemstü atema onük tasentem adokba atema asenoki

shisabulur. India sorkar aser Naga olemteperem tsüngda kati ka akhümtsüba mesüra, küm 20 den tema olemtepa aruba amajok asütsü" ta paisa ashi.

### NAGALOKTILIBA LONGJEMA MALI:

Naga yimten tebilemstü ya Naga nunger ajak atema lir anungji yimten olemtep maneni pusema nungitdang, asenoki aginübatem metetdaksütsüla aser tarutsü atema kechi tajungtiba asütsü'ar lemsatepsüla. Asen Naga loktiliba ya teraksa tia ka nung lir, ta Tongpang-isa ashi.

"Naga nunger ajak tenüng nung noktakba Naga telok ka danga mali, asenoki adokba ola mangashir aser asenok lemsar aliba ajanga tashi mali kümogo. Asenok tsüngda tesempatep aser kin telemsa tera yanga lir," ta paisa shisem.

(Maneni tapak 10 nung...)

## COVID-19 Nagaland: Nisung timtiba dak putet; 3 asü

**Kohima, April 30 (TYO):** Hokolbarnü Nagaland nung taküm atema nisung timtiba dak COVID-19 aliba putetogo. Tanü nisung 226 dak putet aser parnok züngsema nisung ajak agi 13,976 kümogo.

"Tanü Dimapur nung nisung 137, Kohima nung 74, Tuensang nung 10, Wokha nung 2 aser Mon, Peren o Zunheboto nung kaka (1) dak putet. Maneni, nisung 12 taneptsü nguogo.

Parnokji Dimapur nung 8 aser Kohima o Mokokchung nung anana (2) lir" ta Health & Family Welfare Minister, S Pangnyu

Phom-i metetdaksü.

"Nagaland nung taneptsü angurji 87.45% dang kümogo. Dimapur nung nisung 3 asüba züngsema tasür ajak agi 104 kümogo, saka parnok 10 bo tanga timtem ajanga asü," ta State Nodal Officer for Integrated Disease Surveillance Programme, Dr Nyanthung Kikon-i metetdaksü.

Brihostibar tashi nung Nagaland nung nisung 1,61,367 nem COVID-19 vaccine indang dose 2,02,957 agütsüogo, ta State Immunization Officer Dr Ritu Thurr-ia ashi.

KOHIMA NUNG SAMPLE MASHIIBENDENBA NUNG 14 DAK PUTET:

Kohima District Task Force (DTF)-i tesem balala nungi sample 57 mashii bendena tendangdang nisung 14 dak COVID-19 aliba putetogo.

Kohima nung COVID-19 kanga menatepba atema April 28 aser 29 anogotem AG colony, Para-Medical aser Minister's Hill Kohima nungi sample tem mashimashi bendena liasü, ta Chief Medical Officer Kohima, Dr. Vezokholu Theyo-i tanü sangdong ka nung metetdaksü.

## Arishi küm 18-44 atema Covid vaccine ano mangu: H&FW

**Dimapur, April 30 (TYO):** Covid-19 vaccine atongba sülen ang Nagaland nung arishi küm 18 nungi 44 tsüngda alir nem vaccine agütsütsü.

Shitakba agibo asüng (May 1) nungi arishi küm 18 nungi 44 tsüngda alir nem vaccine agütsütsü sentong lir.

Ajisüaka, Hokolbarnü Health & Family Welfare department-i

vaccine tonga aruba sülen ang agütsütsü ta asüba osang metetdaksüogo.

Serum Institute India-i Covishield indang dose 36,580 agütsütsü ta shidi nguogo saka ibaji ano matong H&FW Department-isa ashi.

Covid vaccine agütsüba shilem tasembuba atema state sorkari vaccine dose lakh 4

agütsü atema mapa inyaker, ta parnokisa metetdaksü.

Vaccine agütsüpurtemi selfregistration.cowin.gov.in aser AarogyaSetu App nung tenüng agütsütsü akok saka vaccine agütsüba shilem tasembuba tenzüka anogo osang metetdaksüba sülen ang booking inyakyim tenzüksü, ta H&FW Department-isa ashi.

## Assam-Nagaland arrtsü anasars 2 crore alang heroin apu

**Diphu, April 30 (Agencies):** Karbi Anglong police-i NH 36 aser NH 39 nung ozüng alema shibelenba mozütem mapang shia mita apu nunga shibelenertem maneni mapa inyaker.

Lahorijan nung Assam-Nagaland arrtsü check-post nung Dillai police-i sen crore 2 alangba heroin puogo.

Hokolbarnü Assam-Nagaland arrtsü nung parnoi 12 wheeler truck ka nung heroin ji bena lia apu.

Osang tejangja ka angazükba sülen Dillai police-i NH 36 nung 12 wheeler truck (AS 01EC 9450) ka apu.

Police-i gari kanga junga mita reprangdang sapon pongdang 27 nung heroin gram 331 enoker bena aliba angu.

Tanü apuba heroin indang jenjangji international black market nung Rs 2 crore tema asütsü ta asadangetogo.

Iba dak sendakba nung police-i truck driver Nazrul Islam

(25) puogo. Pa ya Morigaon district kübok Moirabari nungi lir.

Iba atema bushisüngdang tenzükdang heroin ji Dimapur nung abenba aser Nagoan bypass area nung agütsütsüba liasü ta bushitetogo.

Taoba Deobarnü Dillai police-isa Rs 5.5 crore alang heroin gram 775 shi apu.

Iba highway nung mapang shia opium, crystal meth, heroin, yaba aser WY tablets shibelenba apur.

## Changtongya nung 'Tribal Circuit' ta sür oliorartem anenzükdak kilem ka lapok



Advisor Imnatiba densema Advisor H. Khehovi Yeputhomi-i Changtongya Town nung Tribal Circuit lapoktsüdag tangokba noksa nung angur. Changtongya town, April 30, 2021.

**Changtongya Town, April 30 (TYO):** Industries & Commerce, Labour & Employment, Skill Development & Entrepreneurship Advisor - Imnatiba densema Tourism, Art & Culture Advisor - H. Khehovi Yeputhomi-i Changtongya town nung 'Tribal Circuit' ta sür oliorartem anenzükdak mapatong ka lapoktsüogo. Iba sentong nung tourism department nungi ketdangsürtem den district administration, police aser Changtongya putu yimsüsürtem shilem agia aden.

Iba mapatong ya Government of India, Ministry of Tourism ajanga senotsü teyari agüja Swadesh Darshan 2016-2017 sentong kübok

## Principal Director Dr. Kevichusa den tepila sentong agi

**Dimapur, Rongchii/April 30 (TYO):** Health and Family Welfare Department indang Principal Director Dr. Kevichusa Medikhru den tepila setong ka April 30, 2021 nü Directorate of Health and Family Welfare nung agia liasü. Iba sentong nung Dr. I. Talitemsula Jamir, Mission Director NHM menden liasü.

Dr. Kevichusa Medikhru-i iba sentong nung jembiba mapang, sentong nung Medical Minister aser Principal Secretary dentetba ya maongka tulu lir, ta ashi aser pelaba lemsatepa liasü.

Tsüngremi aochia department nung mapa balala inyaka arudang tashi aser shisatsü agüja aruogo, ta pai Tsüngrem nem tenüngsang agütsü.

Food Safety, IDSP, Health Intelligence Bureau, NVBDCP amala nung Medical Officer, SMO, CMO, DDO aser Program Officer inyaker ano Mission Director NHM aser Principal Director inyaketba ya maongka tulu lir, ta Dr. Kevichusa Medikhru-i ashi.

Pai department nung officer aser staff tem dang, department nung kibur ama inyaksü mapang lir, ta ayongzük. Officer ajak ya department indang kibur lir, anungji department ya nüsasa yanglutsüla, aji mesüra danga nungi shingai na atema meyanglutsüsü, ta pai ashi.

Minister aser Principal Secretary tem arutsü aser aotsü, saka department officer tem alitsü, tanü asenok aliba lima ya khen atema dang aser yamaj

yangluba lir. Tribal Circuit nungji mejangdak 'Log Huts' tululu asem lir, cafeteria lir, senden kilem lir, metsümeshidak (toilet), janaona bendendak aser meta penzüsü atema mitza (watch tower) ka yanglua lir. Changtongya Town Baptist Arogo Pastor, Rev. Temshi-i iba tribal circuit meshiteta sarasademtsü.

Khehovi-i iba tribal circuit lapokja jembidang, Nagaland state ya raliwaliren (tourism) tsütsü ngujem kanga lir ta shiogo. Iba ama mapatong amenokba ajanga Nagaland nung tourism mapa tali renloka aoba den lanurtem mapa inyaksü maongka angutsü imlar, ta ashi.

Iba mapatong ya nübur

meyong lir, anungji, ochi shia tejang tangdakja aser tajangzük keta amshitsü asoshi paisa Changtongya nüburtem ajungshi. Paisa iba mapatong junga yangluba den iba mapa inyaksü asoshi Advisor Imnatiba ali tenlaba asoshi pelaba lemsatep.

Advisor Imnatiba-i mapang tatsüka agidang, pa tebou shiba tejungnü/tagütsünü nübu ka liasü aser pa taküm alidang iba tesem nung alu yima züsenteta nüburtem den yaritepa aru, pa nüngtem mapatong ka inyaksü bilema aliba mapang, tia junga iba mapatong ya agizüka tanü asangsang akümer, iba asoshi tourism department aser sorkar dang pelaba metetdaksü. Iba mapatong ya tajangzük keta amshitsü merangtsü, ta pai shisem.

Sentong nung Changtongya Village Council chairman-i jembidang, state government aser tourism department dang iba mapatong yanglutsüba asoshi pelaba den iba ya Changtongya nung kanga dang nüngdakba ka liasü, iba ajanga Changtongya nung tourism luyim tsütsü renloksü aser ibai yimertemi tajungtiba nung amshitsü merangtsü, ta ashi.

sorkar tenzük aser yimten yimsüsür ajak künü anogo mapa nungi anisüngzüksü, ta Minister, Health & Family Welfare, S. Pangnyu Phom-i sentong nung ashi.

Medical Minister ka ama inuakba mapang Dr. Kevichusa ya khenyongi balaka aser tasüngtet ketdangsürka ta ajitet, ta pai ashi.

"Pai pa sempet tajungtiba sayuogo aser talisa tashidak wara agi alima tesem ajunga sünger aliba mapang pai tajungtiba nung tenzükogo, aser pai department aser state nung aliba nüburtem atema kechi inyakogo, yangji officer aser staff temi tatishitsü tajung angazüka inyaksüla," ta Minister Pangnyu Phom-i ashi.

Minister-isa Department, Directorate aser district nung officer aser staff tem dang telemsa madokdaksütsü tenangzükba nung kibong ka ama lungjemer inyaksü ajungshia liasü.

"Tajungtiba atema metongshitsüba ajanga state nung nüburtem metetsümonga ajangzük. Asenok külemi kasa rong ya ania state nung department tajungtiba kumdaksüti arung," ta pai ashi.

Taoba küm nungi tang tashi state nung tashidak wara den benanga agütsür raraba atema pai Principal Director tejenba aser tasenba, senior officers, CMO, MS aser health worker ajak dang pelaba lemsatepa liasü.

"Officer aser department mechi linük nung asen state ya maparen balala inyakba tsütsü

tajungtiba state ka lir," ta pai ashi aser state nung nüburtem kumzük ayutsü atema ajaki maneni inyaksü ayongzükba liasü.

Principal Secretary, H&FW Govt. of Nagaland, Amardeep Singh Bhatia, IAS ajanga sentong nung jembiba mapang, Dr. Kevichusa-i menden balala nungi department tenzükogo aser pa shisatsü nung sentongtem inyaker aser maneni inyaksüla, ta ashi.

Department/sorkar küm 35 tashi tenzüksetba ya tia taka aser benjongtsü mapang ka lir, kechiaser iba ama maongka ya aikati majangshir, ta pai ashi.

## Directorate of Agriculture-i tetuyuba kar agütsü

**Dimapur, Rongchii/April 30 (TYO):** Alu wadang nung COVID-19 tashidak menatapa aoba azüoktsü atema Directorate of Agriculture-i tekümdangtsü aser tashidak nung jenboa alitsü tasa kar lemsatepogo.

Alu inyakba mapang mapa inyaker tem tsüngda süklep 4-5 tetsüngda iter inyaksüla mesera alu tapak ka nisung ka nem lemzüksür inyakdaksütsüla. Iba ajanga mapa inyaker tem tetsüngda ita inyaksangshitetsü.

Aluyimer ajaki parnok teni aser tebang junga nembangtsü atema surgical mask mesera sü anaben reptepa alener inyaksüla. Mapangshia soap aser tzü agi teka metsüka alitsü nüngdaker. Süshitema anogoshia shitoktsüla.

## Ao Senden-i Moatsü salem lemsatep

**Dimapur, Rongchii/April 30 (TYO):** Asen Aor asoshi Moatsü mung ya kangasa tongtipang sobaliba benjongmung ka lir. Iba mapang nung nüburtemi sobaliba asüngsashia lipok tsüngrem tushia aser temoatsü meshia benjong amunger, ta Ao Senden sangdong ka ajanga ashi.

Tang alima nung COVID-19 wara tanabuba tüzsem tesashi aliba ajanga Nagaland Sorkar totuyuba dak ajemdaker 2021 Moatsü benjong ayongzükba

memungtetaka Ao Senden mendendi ajanga Ao senso ajak dangi iba tepela benjongmung salem lemsateper, ta Ao Senden tir Chubawati Longchar aser tongti zülur Imtipokyim nati sangdong nung shia lir.

Benjong longsotepasa memungtetaka ajaki iba Moatsü mapang nung temoatsür Tsüngrem dang alima asoshi temoatsü meshia aküm agüja anemponga amungtsü ayongzük, ta Ao Senden ajangasa ashi.

## COVID mozü atema Diphupar nung Sub-center ka bendenlok

**Dimapur, Rongchii/April 30 (TYO):** Diphupar A nung nütsüng yongsük 20,000 dak tema nem mozü agütsütsü nüngdaker ta ajiteta Village Level Vigilance & Monitoring cell for COVID-19, Diphupar Village Council ajanga Chief Medical Officer Dimapur, Dr. Mereninla dang Diphupar A nung Sub-Center talila ka bendenloktsütsü asüngdanga liasü, kechiaser Diphupar nung tang aliba Sub-Center nung yimdaklar ajunga COVID-19 mozü agütsü mesü-menaga liasü.

Yimdaklar nüngdakba ya tejangja ta angateta, CMO Dimapur-i temaba ketdangsürtem den shisa agitepa sülen Diphupar Village Council Hall nung Sub-Center ka bendenloktsü temelaba agütsü, kong April 30, 2021 nü nungi tenzük arishi küm 45 nungi temapur nem mozü agütsür. Iba center nung vaccination team ya züngsem trok agi akumba lir.

Iba Sub-Center tasenba nung COVID-19 mozü agütsü tenzükba sentong ka agidang, CMO Dimapur-i Diphupar nung alirtem dang sorkari agütsüba maongka agia mozü agütsü ayongzükba liasü.

Lai sentepa alirtem dang mozü agiba ajanga timtem balala adokba indang olulu nung mamangtsü nenshia ashi aser

Dimapur nung iba mozü agi tenzük tang tashi timtem tulu ajura mali, ta ashi.

Lai Diphupar nung alirtem dang maneni COVID-19 tashidak nungi jenboa alitsü yimyatam amshitsü ayongzük, kechiaser COVID-19 wave tanabuba ya tesashiba nung Nagaland densema linük nung kongshir, ta ashi.

Dr. Mereninla-isa putu menden dang bendanglen nungi Diphupar yimtsüngi meyipa shilangertem kanga junga mittsü aser parnok dang SOP tasenba indanga nensha ashi, kong bendanglen nungi meyipa shilanger ajungai Negative RTPCR sayutsü shia lir.

Diphupar Village Council-i department den teti yaritepa atema lai pelaba lemsatep aser tang mozü agütsüba maparen nunga yamaji shilem tajung agir, ta ashi.

Sentong nung Medical Officer Chumukedima, Dr. Narola-ia o tatsüka jembiba aser Pastor Tangkhul Baptist Church Diphupar, Rev. Candid Satro-i Tsüngrem temoatsü jazüka sarasadem.

Iba sentong nung Co-convenor VLV & MC, Zuchumo Mozhui menden liasü aser Head GB Diphupar Village, Kekhwetshu Khutsoh-i tepela ankep o jembiba liasü.

Anisüngzükba mapang aser chi chiyongba mapang nisung ana tsüngda süklep 3-4 tetsüngda ita ayutsüla aser chiyongtsü lemsatepa machitsüla. Alu inyakba mapang dehydrate asüba nungi jenboa alitsü atema tzü peria ajemtsüla.

Aluyimba maparen ajak shilem balala küma lemsar inyaksü sentong yanglutsüla aser alu ka nung kasa anogo nisung aika anioka minyaksü merangtsüla.

Tashidak keta alirtem nungi jenboa alitsü atema osang tejangja agir takok tashi tema manemi alirtem alu inyaksü atema anir maotsüla.

Alu wadang nung amshiba hadirtem kanga junga mereksüla aser takok tashi

melentepa mamshitsüla.

Alu atema osettsüt/metsüjangnatsü ali aoba mapang aser alu nungi adokba chiyongtsütem ayoki shishilembadaki aoba mapang tetuyuba sülen tashi anga anidaksü kanga tongtibang.

Alu anogo aika agia inyaksüsa kümra alu minyakma tashi alu toktsür tou, ajita asünungdang mapang kümzüksü aser pei kinungertema kümzükba toktsütetsü.

Osang kar danga aginüa lira pei tata Districts/Sub-divisions nung District Agriculture Officer/Sub-Divisional Agriculture Officer/ATMAs tem den tongteprateptetsü, ta Directorate sangdong ajanga metetdaksü.



Hokolbarnep Assamese journalist Nilakshi Bhattacharyya COVID-19 ajanga asü. La ya Delhi nung alir aser anogo 15 tejakdang la kinungbo journalist Kalyan Barooah tenaprong dak COVID-19 puteter anepaluyonga aru.

## BJP-i aniba teloktepi Assam sorkar akümtsü

**Guwahati, April 30 (Agencies):** Assam nung BJP-i aniba National Democratic Alliance (NDA)-i sorkar akümtsü ta exit polls ajanga metetdaksüba sülen tanü BJP-i Assam assembly nung menden 85 nung takok angutsü ta shiogo.

"Ozü teloki menden 70 nung takok angutsü. Maneni, Asom Gana Parishad-i 8 aser United People's Front-Liberal (UPPL)-i 5 nung takok angutsü. Bodoland Territorial Region (BTR) nung UPPL-i menden 12 nungi 8 nung toktep" ta BJP state president Ranjeet Kr Dass-i ashi.

"Onoki exit poll magizüker mesüra taia ta-a mashir. Ibaji parnoki asadantetba lir, saka grassroots workers 4.6 lakh nungi osang agitepa onoki asadantetogoto" ta Dass-isa metetdaksü.

Telok balalai exit polls metetdaksüba nung Republic-CNX-i NDA-i menden 74 nungi 84, ABP-Cvoter-i menden 58 nungi 71, India Today-Axis-i menden 75 nungi 85, Times Now-i menden 65 aser Today's Chanakya-i menden 61-79 nung takok angutsü ta ashir.

Assam nung field survey exit poll agiba news organisation InsideNE-ia menden 57 nungi 67

nung takok angutsü ta ashir.

"NDA-i Barak Valley nung tamakok angutsü. Onoki menden 12 nungbosa takok angutsü ta imla saka tangbo menden kar nung takok mengutetsü ama ajiteteter. Ajisüaka onoki menden 7 nungbosa takok angutsü. 2016 election nung onoki menden 8 nung takok ngua liasü" ta Dass-isa metetdaksü.

Bengali pur timba ser aliba Barak Valley nung BJP-i Citizenship Amendment Act 2019 ajanga tajanzük angutsü imla saka ibaji matalok.

NDA-i Upper Assam nung menden 7 talila angutsü kechiyong Upper Assam nung alirtemi Congress aser AIUDF (All India United Democratic Front) tesentaktep atema mepelar.

BJP aser onok den yaritepertemi Titabor, Nazira, Mariani, Sivasagar, Golaghat, Sarupathar aser Doomdooma amala Congress-i ketdangüsü aruba tesentem nung takok angutsü, ta Dass-isa ashi.

Pezüben tashi MLA aser Bodoland People's Front (BPF) minister Chandan Brahma-i Sidli nung NDA den yaritepba UPPL candidate Jayanta Basumatary tsüngdang tamakok angutsü, ta paisa metetdaksü.

## Assam strong rooms & EVMs nung teka ayir: Congress

**Guwahati, April 30 (Agencies):** Assam Assembly election indang votes azüngtsü anogo ana dang lia opposition Congress-i Assembly constituency asem kübok strong rooms, EVMs aser control units nung tim masüba indang ken o benokogo.

"Assembly constituency 9-Jaleswar, Chabua, Dibrugarh, Lahowal, Moran, Dudhnoi, Goalpara East, Goalpara West aser Dhakuakhana nung aliba strong rooms nung tim masüba ajitetogoto" ta Assam Congress president Ripun Bora-i Chief Election Commissioner dangi shidi zülü.

Dhakuakhana constituency kübok polling ana nung ballot unit, control unit aser VVPAT indang tags & slips strong room anasa angu. EVMs, control

units, ballot units aser VVPATs indang identification numbers meputetba indang osang Deputy Commissioner dang shiogo, ta Bora-isa metetdaksü.

"Goalpara district nung Congress candidate pezüü district election officer dang April 28 nü tebur asem strong room aser control room telungi mapa kar inyaksü ta ser electrical devices bener aiba atema shidi zülüogoto" ta paisa shisem.

Election Commission-i strong rooms aser EVMs nung tim masüba mapa inyakba atema bushisüngdang asütsüla ta Congress lennir-isa ashi.

EVMs aser strong rooms nung tim mesüi inyakba constituency tem nung VVPAT azüngtsüla ta Bora-isa takhangba agütsü.

## COVID-19: Manipur nung 314, Mizoram nung 140 aser Tripura nung 124 dak putet

**Imphal, April 30 (Agencies):** Tesüiba ghonda 24 tsüngda Manipur nung nisung 314, Mizoram nung 140 aser Tripura nung 124 dak COVID-19 aliba putetogoto.

Manipur nung nisung 314 dak COVID putetba züngsema nisung 31315 tashi kümogoto aser nisung 400 süogoto. Manipur nung tang nisung 1225 anepaludar.

Mizoram nung nisung 140 dak putetba züngsema nisung ajak agi 6019 kümogoto. Nisung ka asüba züngsema tasür ajak

agi 14 kümogoto.

Mizoram nung nisung 4882 tashi taneptsü nguogoto aser tang 1123 anepaludar.

Külen, Tripura nung nisung 124 dak putetba züngsema nisung ajak agi 34859 kümogoto. Tanü nisung ana asü aser tena züngsema tasür ajak agi 393 kümogoto.

Tripura nung nisung 33492 taneptsü nguogoto aser tang 951 anepaludar.

Tripura sorkari Agartala Municipal Corporation nung May 31 tashi night curfew alitsü

atsülangogoto.

Tripura chief secretary Manoj Kumar-i April 22 nungi April 30 tashi night curfew aliba osang metetdaksü aser ibaji ano atsülangogoto.

Itanagar Capital Region (ICR) nung Covid19 azüoktsü atema district administration-i May 1 nungi night curfew alitsü osang metetdaksüogoto.

Aonung 9:00 ako nungi anepdang 5:00 ako tashi curfew alitsü, ta Itanagar Capital Region district magistrate in-charge Talo Potom-i ashi.

## ULFA-I lennir Jibon Moran Dibrugarh PS-i anir aruogoto

**Dibrugarh, April 30 (Agencies):** Brihostibarnü ULFA-I tanishir Jibon Moran Arunachal Pradesh nungi Dibrugarh police station-i anir aruogoto.

"Yashi nikongdang Assam police aser Indian Army yaritepa Purnakanta Dangoriya (Binod, Jibon Moran) Dibrugarh police station-i anir aruogoto. Pa dang asüngdangya südar anungji tangbo osang kecha meshitettsü" ta Dibrugarh SP Preetak Kumar Thube-i ashi.

"Onoki Dibrugarh hospital nung pa temang tendangogoto aser Covid-19 test agiogo. Pa temang junga lir" ta Dibrugarh SP-isa ashi.

Bodbarnü Myanmar nungi pillar number 163-164 ajanga India-i aruba sülen Jibon Moran ya Indian Army 3 corps-i anir ao.

ULFA-I nung küm 30 tashi adenba sülen Jibon Moran temai



adokogoto. Pa ya ULFA-I nung tongti ketdangsür ka liasü.

Army camp nung central intelligence agencies-i pa dang asüngdangyaogoto ta osang angazüker.

Jibon Moran temang mejungi akümba agi sodi agütsür ta tawa tu ULFA (I)-i metetdaksüogoto.

Arishi küm 65 tain Jibon Moran ya 1984 küm ULFA nung adenba sülen Burma nung training agi.

Moran ya Kakopathar kübok Uban nung lir aser pa temang mejungi akümba ajanga meta talangi jajatsü makoker ta osang ajanga ashi.

## Udalguri nung arem shiditemi nisung ka ajemset

**Guwahati, April 30 (Agencies):** Assam kübok Udalguri district nung arem shiditemi yimdaklir ka ajemset.

Iba nisungji Indo-Bhutan arrtsü anasa Borengajuli yim nungi Bimal Debnath ta jangjaogoto.

Indo-Bhutan arrtsülen nungi arem shidi telok ka Dimakuchi, Rajagarh, Nalapara,

Borengajuli, Dharmajuli, Tankibasti aser Bholatar yimsüngtemi aru.

Shiditemji chiyungtsü bushia aru aser tesüiba hopta ana shi ka yimdaklirtem tsübudaksür aser kiojen aika raksatsüogoto.

"Küm shia onok yimdaki arem shiditem arua timtem agütsür" ta Borengabari nung Tankeswar Deka-i ashi.

Forest department-i yimdaklirtem timtem atema meblemetsür ta wildlife conservationist temia metetdaksüogoto.

Khalingduar Reserve Forest aser Bornadi Wildlife Sanctuary nung electric fencings lir saka mapang shitak anepalu masüba ajanga aika raksaogoto ta yimdaklirtemi ashir.



Agartala nung COVID-19 wara azüoktsü atema temporary market ka nung nisungtem shishilembaba angur. Shishilembadak nisung o nisung tsüngda tepila ayutsü atema playground ka nung temporary market lapoka lir. (Agartala, April 30)



## TIR YIMYIM YIMOBILEM (EDITORIAL)

DIMAPUR KÜPTOKNÜ, MONUPII (MAY) 01, 2021

### Putepa aliba

**S**hitakba bilemdangdi sura tang ya Naga nung asoshi nungdak tulutibaji putepa alitsuba ya lir. Iba nungdakji repringteta tang Kohima nung yashi NSF lokti senden amongba mapang Putepa alitsuba omen nung tongtibang onuktem benoka jembigo. Atangji, putepa alitsu asoshi ajak ka kuma longjemtsula ta masu mesura tebilemba ka dang asutsula ta masu saka telok aika liaka aser tebilemba balala suaka putepa alitsu asoshi kati ka angatetsu kanga nungdaker. Ken topur junga atentsu atema nisung aikati kulemi ola balala adoka atenba ama, asen lima aser lokti nung kin kidong aser yimten telok balala alitsua akok, saka nisung aser telok balala jagi tangar den putepa alitsu asoshi akok tashi pei bilemba aser pei inyakba dang shitaka ta mebilemi, tangari bilemba aser inyakbajia angatetsu merangtsu kanga nungdaker. Telok ken atandang, nisung kati tangar dang nungibo ni trok tajungbaji ta ser pa tenutsu tenra, iba jagi telok kenji liromedema putepputepa metentetsu. Iba kasaji tanu asenok Naga nung yimten aser lokti nung telok aika lir, aser telok kati danga ni tajungbaji ta bilema ola tuluba adoktsu merangra kenji topur junga metentetsu. Atangji, telok aika alibaji tai masu saka telok aika tenteta yur meputeptetbajiang tai lir. Alima nung telok ka dang aser tebilemba ka dang ta asunungbo putepa alitsuba ojang ya dena menungdaker, saka telok aika aser telok shia tangatetbaa balala ta asuba agi putepa alitsu inang jembitsu nungdaka akumer. Aji oda, kiojen tajung, lenmanga tajung aser achiajemtsua peria kar ta liaka, talirtem rongnung putepa melitetra ki tajung nungji tiptema melitetsu, lenmang tajung nungjia pelashishia mejajatetsu aser achiajemtsu peria aliyonga jangratema chiamejemtetsu. Iba kasaji, Naga yimten atema nuchiso jenjang ka bener aruyonga Naga nung putepa melitetra nuchiso tiajiang tetsubutsuka akumtsu. Iba tangatetba nung Naga nung yimten, lokti aser arogo lenirtemi anir koba ama telemtetba ka agitet nungang Naga nung putepa alitsu ta bilema, atsu tezulen nungi dang repringa melii, tadongtsu purtem tonga oagi asenok ajaki shisalemsateptsu nungdaker. Atangji, Naga nung telok aika lemsar meputepi aliba ajanga nisung karbo telok kar anema, telok kar teyari agia tajanzuk ngua alitsua akok, ajisuaka iba tajanzukji tajanzuk masu saka pei asoshi lendong bendenba mapa ka dang akumtsu. Naga nung meputeptetba timtem ya, atangji, Naga nung memeimba agi masu saka Naga nung meima inyakdang tebilemba aser taginuba balala akumba ajanga lir. Aji oda, kari India kubok Nagaland state agi temulung ser linur saka kari India kubok melinur ta tia mejungi meputep tenzuk. Iba amaji, tanua kari tang aliba Nagaland state yimten jenjang ya tera temaba yanglushir linur saka ano kari India kuboksa suaka Nagaland state dang temaba yimten menden ka lateta yuner ta tebilemba ajakji Naga nung ajungtsu atema lir saka tangatetba aser taginuba balala, iba jagi meputeptetter. Item tebilemba aser tangatetba balalaji putepdaksutsu atema Naga nung ajaki kanga suoki ia Naga yimten nung shilem agitsu kanga nungdaka kumogo. Naga yimten nung shilem agibaji telok ka nung adentsula ta masu mesura telok ka yaritsula ta masu saka tang aser tarutsu atema Naga nung atema kechi tajungba asutsu ta asuba bilemba nung ola adoka shisalemsateptsu nungdaker. Asenoki aiben Naga nung putepa alitsu atema yimten jenjang ka latetsu nungdakba ken o ya India temzung kubok election agiba mapangang jembia angashir aser election temerbo senotsua otsuang jembir. Iba jagi asenoki asenoksasa asen tebilemstu mekoktetter aser tebilemstu mekoktetba agi putepa melitetter. Iba amaji mesui asenoki asenok putepa alitsuba indang ya kanga nungdak a bilema, election agiang tagi, Naga nung putepa alitsuba onuk yabo election onuk masu saka Naga nung putepputepa sobalibaa aotsuba rongdak nungdak sobaliba onuk ka asutsula. Aji oda, joko tang nungibo Naga nungertemi Naga nung putepa lia aotsu atema, pei amenba menden dena tenla agutsutsua bilema inyaktsu aser jembitsu kanga nungdaka kumogo. Iba jagi dang Naga nung putepa litettsusa mapang tajung ka alangzuktetsu.

## OLEMSABANG

### Sapua mejembiba "Tama" agi tenzukba ojang eshika

T. Meren Paul, Kohima.

Asenok Aortum-i tim masüba tatalokba/matalokba aser yimya masüba maparen aser inyaksangshi indang jembidang oyim mashilen nungi ozüazür (negative attribute), tatishitsü agi, kodang "Tama" ta asüba ojang nungji repsema tesülenji ojang ka "chi" ta bendenlokder "tamachi" ta adoker ("chi"- is prefix by the word "Tama"). Asenoki nüji masüba nisung dang "tamachi" ta ajar kechiyong, tangar maodak lendongtsüdong alidaki kecha marendagi pa/la tama chia chia aoba agi "tamachi" ta ajar, saka tamasa aoba dang ajar masü. Akidang tsürabur mapang nungbo o taret rasaa meshiaka ojang ka agi peria jembia aru saka tanüasungbo sapua pulushilua mejimpiba "tama" agi tenzüka jembiba (prefix) ni angazükba ojang karh, oshi oben meteter medemer kar den shisa obang agir lanur tumi metettsu atema lemsateper.

1. Tama+chi = Tamachi: Nüji masüba nisung,
2. Tama+chitsü = Tamachitsü: Chiyongtsü, süngjanglijang, süngolemba mesüra shiruru aser ozüsangnu machitsüla dang ajar
3. Tama+dangtsü = Tamadangtsü: Tejang madangba süngdong lidong
4. Tama+doktsü = Tamadoktsü: Joko tanaben madoktsü, yasür kodanga mataloktsü.
5. Tama+gitsü = Tamagitsü: Osettsüset mesüra süoshi teraksa mesüra tamajung tindoktsüla, magitsüla oset mesüra mapa
6. Tama+intsü = Tamaintsü: Süngdonglidong mainla, rahjang
7. Tama+itsü = Tamaintsü: Maibelentsü atema tajetetsü/tebendangtsü ayak enokba
8. Tama+inyaktsü = Tamainyaktsü: Tanuri mesayangtsü sayanga inyakba
9. Tama+jatsü = Tamajatsü: Nisung tenüng maksütsü o mesüra mapet ajaba
10. Tama+jembitsü = Tamajembitsü: Mejembitsü O, tajanzük maliba, maksütsü o aser teraksa adoktsüsa jembiba
11. Tama+jemtsü = Tamajemtsü: Temesepba yi mesüra mozü tamajung ajemba
12. Tam+jung = Tamajung: Tajung masüba oset mesüra kechisarena yimya aser mapa
13. Tama+ka = Tamaka: Makaba, bilema malibaba o, oscü nüloktsüba
14. Tama+kar = Tamakar: Kecha makaba nisung, sensaker, par akatsü kecha mali
14. Tama+kangtsü = Tamakangtsü: Masüngdangtsüla, makoktsüla mesüra memeshitsü makangtsüla meshiba
15. Tama+ket = Tamaket: Mejimbiba, maketba teyazü o donglokja tai agütsüba
16. Tama+kok = Tamakok: Takok manguba, maparen shidak menyaktetba
17. Tama+kumtet = Tamakumtet: Nisung mekumtet, awashi yimyayimko kecha mashi, memetet
18. Tama+litsü = Tamalitsü: Oset tamajung mesüra menüngdakba oset/kechisarena malitsüla alia bener aruba
19. Tama+mangtsü = Tamamangtsü: Tatalokba tulu mesüra mapa tamajung, tamangtsüla masü atalokba
20. Tama+matsü = Tamamatsü: Mamatsüsa adalokba, ajuruba

(Maneni asüng adok nung angutsü...)

### Aluyimer atema Covid-19 nung sendakba tetuyubatem

Alu mapa inyakdang Covid-19 tashitak zuinba nungi kumzuktsü aser jenbuttsü asoshi Directorate of Agriculture, Nagaland ajanga item tekümdangtsü benshitsü lemsateper.

1. Alu nung mapa inyakdang teinyaker shia 4-5 feet tetsüngda lemzüka inyaktsüla. Nisung ka nungi ka tetsüngda peria yudakja mapa inyakba ajanga tashitak nungi kümzüksü.
2. Aluyimer ajak alu mapa inyakdang face mask ozüng süa inoktsü mesüra sü agi teni (nose) aser tebang (mouth) junga nempangtsüla. Ano mapangshia taka sapon (soap) agi junga shitoktsüla aser suoshi anogoshia mapa temer shitoktsüla.
3. Alu nung anisungzük dang aser chi chiyong dang 3-4 feet tetsüngda nung amentsüla aser chiyongtsü lemsateba machitsüla. Mapangshia tsü peria ajemtsüla.
4. Alu mapa sentongtem tarensen agi yanglur inyaktsüla aser akok tashi nisung aika alu ka nung külemi meinyaktsüla.
5. Temang nung timtem aser shilu manem lira alu mapa meinyaktsü kechiaser pei sasa kümdangba ajanga külemi teinyakertem iba wara nungi kümzüktet. Temang anema alirtem dang alu mapa inyaki aotsüla.
6. Alu nung amshiba nok, mertsüng, alu lem amalatem junga shitoktsüla aser item osetem pei meyong dang melentepa mesüi amshitsüla.
7. Bazaar-i alu osettem alitsü aser alu nungi züsentetba tayoktsü aodang District level Task Force-i lateta yutsüba Standard Operation Procedures Covid-19 atema (SOPs) junga amshitsü metetdaksür.
8. Alu maparentem matem tashi alu mejanga inyaktsü tajungba kechiaser iba ajanga mapang kümzüker, na aser ner kibong tashitak nungi kümzüksü.

Nüngdak aser tasüngdangba lira District Agriculture Officer/ Sub-Divisional Agriculture Officer/ ATMA den tongtepreteptsü metetdaksür.

Issued by : Directorate of Agriculture, Nagaland  
Translated by: Shri. Imlipokim Pongener, ATM, ATMA Mokokchung.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger agateta agitsü mepishir

## Eastern Bible College pur 47buba Graduation sentong agiogo



**Dimapur, Rongchii/April 30 (TYO):** April 24, 2021 nü Bank Colony, Dimapur nung aliba Eastern Bible College (EBC) pur 47buba graduation sentong agiogo; college nungi nisung 37 graduate asü aser parnok rongnung nisung 20 Master of Divinity (Residential) nisung asem 3 Distance Learning; nisung 13 Bachelors in Theology (Residential) aser ka Bachelor of Christian Ministry (Residential) liasü.

Graduation sentong nung tejaoker, Nagamisa Baptist Churches Association nung Executive Secretary, Rev. Dr. R. Meren Jamir-i tongti o jembia liasü.

Dr Meren Jamir-i, graduate asür Laishirtemji Tsüngrem tenzüksü atema jatetbapurtem lir, aser ibaji ajanga ministry aser nija taküm nung kishi aika lapoktsütsü aser maongka aika angutsü, ta ashi.

Rev Dr Meren-isa, mezüngbuba jabiji, mangdang alitsüla, kechiyong mangdang melira nüburttem samar; mangdang melira tenzüksü wadang nung tamakok angutsü, ta ashi.

Yirusalem Arogo nung

süngjang aika tangtsüba agi alima rangben kongshiba nungi asenoki tangazükba akatsüla, ta pai ashi.

"Alima kongshitsü atema asenoki Tanela Temeshi nüngdaker. Mezüng Arogoji Tanela Temeshi tashi ajanga tenzüksü aser ibaji ajanga amangbapurtem taküm nung temelenshi liasü. Ainkartem tesayubatem nung parnoki ranglok aser parnoki Tsüngrem O nung rangloker inyak," ta pai ashi.

"Tanabuba jabiji temeim lir. Yohan-i fellowship ka atema kati ka meimtsü nüngdak ta ashi. Tenzükba wadang nung iba jabi ya kanga tongtibang," ta pai ashi.

"Tasembuba jabiji nütsüngsüba lir. Tamalen Arogoji nütsüngsüba Arogo liasü. Arogoi samaba tanelatem bushi. Arogo nung amangbapur tasenpurtem züngsemba ajangadang tenzüksüba wadang abensadaksür," ta pai ashi.

Iba sentong nung College Principal, Rev Dr T.N. Lotha Jr-i lokti pelaa agizükba o jembia aser Dari Tudu-i tepila o jembia liasü.

Presbyter C3 Dimapur Section, AGEI, Rev. Pikhato

Kath-i sarasadema iba sentong tenzüksü aser Lecturer Kr. Neopi Kipgen-i AGEI, Boro Baptist Church Association, Lausanne Mission Diaspora, Asia Evangelical Alliance, Millennium International University USA, Ambrose University Jaffray Centre for Global Initiatives Canada aser World Mission USA nungi yokba salem osang balala zünga metetdaksü.

Sentong nung Graduate of the Year award Tunato Y.Swu (M.Div. class) nem agütsü aser Zuchanbeni Tungoe (M.Div class) o Dari Tudu (B.Th class) nati Academics Excellency Awards angu.

M.Div class nungi Thang Suum Lian, Apinuo Pienyu na aser B.Th nungi Konzan Humtsoe aser Khriesakuonuo Theunuo nungeri Social Life Awards angu.

M.Div class nungi Atoulie Sopfunuo, Khovelu aser Allen nunger aser B.Th class nungi Konzan Humtsoe nungeri Christian Ministry Awards angu.

Degrees lema agütsüba sülen Principal, tesayurtem, Arogo lenirtem aser sarasadem walunirtemi graduate tem atema sarasademja liasü.

## ANOGO ABEN TSÜNGREM DEN

### Nükpok saka angur

"Ni nükpoker ka liasü, saka tangbo angur aji dang nibo metet". Yohan 9:25b

Asen lima nung 1970-1980 tashi nung revival tulu adoka Tsüngrem Tanelai tesüngmangtsü sayatenya mapatem jenti inyaka liasü, item rongnung tasodang nungi tenük poker asoba nisungtema dena tenük lapokja parnoki anguba indang kulitem asüba tatalokbatem ngua liasü.

Tanü tashi nung ibala ama sarasadem tashi dak alaka alima nung meimchirtem lepa metetba medical science ajanga nükpoker tenük lapoktsüba indang kecha tatalokba otsütem nung lepa mangur. Yohan tapu 9 nung Yisui tasodang nungi tenük poker asoba nisung ka aneptsüba angudang Yihuda nunger rongnung Farisitemi Pai sayatenya inyakbaji anema nokdak; kechiaser Farisitemi Yisui amungnü aneptsü nung paji temenen nisung ta O-ji ammet. Parnoki nükpokba tsürabur aser nükpoksang den O ashishitepa jembia, idangji tsüraburi Yihuda nunger tsübu nung nükpoksang nübu jungogo pa dang asüngdangang ta langzüba angur. Nisung shiba nükpoker lia Yisui pa tenük lapoktsü pai indang indanga langzü "ni nükpoker ka liasü, saka tangbo angur aji dang nibo metet". Amangbapurtem Yisui ne tanela tenük lapoktsüba indang nai meteta lirna?

### Sarasadem

Kibuba Yisu, nai kü tanela tenük lapoktsüba asoshi Ne tenüng asanger. Amen



Bnei Brak, Israel nung Yihuda nungertemi Lag Ba'Omer benjung amongba mapang tangokba noksa nung angur. Rome yimli mapang wara ka ajanga Yihuda nunger jenti asü, aser iba wara anenba nungtem nung parnoki iba benjung amonger.

## India nung Khristan Organization balalai Covid Relief agütsür

**April 30, 2021:** India nung coronavirus case ajak senteper million 18 jungogo aser iba tashidak agi nisung 200,000 dak tema süogo; tang linük nung iba wara anema raraba mapang nung India nung Khristan Aid organization balalai teyari agütsütsü atema maparen tenzüksü.

Alima nung nütsüng timba aliba linükji China lir, aser tanabuba linükji India (nütsüng billion 1.4) lir. Hokolbarnüa India nung nisung 386,452 dak coronavirus putetogo.

Alima nung iba tashidak agi nisung lakh 2 dak tema asüba linük pezüji United States, Brazil, Mexico aser India linüktem lir.

Tang India nung coronavirus tashidak agi shirangertem atema hospital

nung yipten peria maliba, oxygen peria maliba aser nüngdakba mozü peria maliba mapang nung Khristan organization aikati nüburttem yari tenzüksü.

Evangelical humanitarian aid organization- Samaritan's Purse teloki parnok indang website ajanga, parnoki India nung partners den senteper iba tashidak agi shirangertem nem teyari agütsüba den külemi teimla agütsür, ta metetdaksü.

India nung iba wara agi mejungi kongshiba tesem ka nungbo Samaritan's Purse-i hospital ka nem kanga nüngdakba medical supplies agütsüdar.

Samaritan's Purse-isa local partners den senteper nüngdakbapur kibong 1,000 dak tema nem chiyungtsü

agütsüdar.

Evangelical aid organization- World Vision-ia India nung aliba World Vision branch ajanga hospital 93 nung yipten aser oxygen concentrators agütsütsü atema US nunger sen million 2.7 lema agütsütsü renemdar.

World Vision India's Humanitarian Emergency Affairs department nung tongti, Franklin Jones-i, "Iba tensa ya ano tamajungba kümdar, anungji India nung coronavirus azüoktettsü atema alima linüktemi India nunger yaritsüla," ta ashi.

Paisa, "Kanga sensakertem nem healthcare agütsütsü atema World Vision India-i sorkar den senteper inyaker. Sorkari nisung timtiba yaritsü merangba maparen nung onoki

district administrations nungita nem chiyungtsü agütsür, ta yaridar," ta metetdaksü.

India World Vision-ia "Parnoki coronavirus parnok sasep nung timtem ajangshidar, kechiyong parnok staff züngsem 100 shi dak coronavirus putetogo aser anabo iba tashidak agi süogo.

Gospel For Asia-ia India nung wara ajanga aya-tzüra tia nung alirtem atema tebilemstü kaa nüngdakbapurtem nem chiyungtsü lema agütsüdar.

Osangbener den jembidang Gospel For Asia UK Director, John-Paul Dao-i, kanga sensakertem aliba tesemtem nung nisung aikati Arogo dang nungi teyari imlar; yamaji Arogo katibo anogo shia nisung 500 dak tema mesüdar aser Gospel for Asia-i community centers nung community kitchens amenoka sensakertem

nem chiyungtsü agütsür, ta metetdaksü. "Parnoki coronavirus tashidak dang nungibo aya-tzüra atema tebilemstü tuluba akar. Yimti tuluka nungbo train stations nung anogo shia tanur 20-25 shi arur, aser parnokji tsüraburtemi chiyungtsü magütsütetba ajanga train nung yokba tanurtem lir. Yimti tulu nungbo meshimetsüba ajanga chiyungtsü angutsü mesüra kibong kari temeim ago anioka lidaktsütsü, ta teimla nung tsüraburtemi tanurtem yimitemi yoker," ta paisa metetdaksü. "Tang India nung wara tensa mejungi liaka nüburttem aikati Tsüngrem dak teimla angur, aser onoki iba teimlaji agütsütetba atema pelar," ta paisa shisem.

**OLONG PAITEP # 5798**

1		2					3			4
							5			
6					7					
							8			
		9								
								10		
11					12					13
14			15							
					16					
17										
			18							

<b>TIPILEN</b>		<b>LANGTSÜNGLEN</b>	
1. Tzü atsüngdena alidak - (8)		1. Tushi - (5)	
5. Zünger mezüంగా - (4)		2. Okshia - (6)	
6. Alu inyakdang amshiba - (6)		3. Sowa-solem shiruru ka - (4)	
8. Ner tsürabur tetsü - (4)		4. _____ maru - (5)	
9. Yisui sema jajaba tzüyim ka - (5)		7. Aria bilemtepba - (7)	
12. Tilutsü - (5)		10. Nangnanga jembirtem - (6)	
14. Yimti tulu - (4)		11. Nguyutep - (5)	
16. Ak mesükba shiruru ka - (6)		13. Sungjang temoktsü - (5)	
17. Te_ _ _ _ m - (4)		15. Aor kin ka - (4)	
18. Mepetmesü adok - (8)			

**OLONG PAITEP # 5797 TELANGZÜBA**

<b>TIPILEN :</b>		<b>LANGTSÜNGLEN :</b>	
3. Anüshi, 5. Bilem, 6. Anep, 8. Rata,		1. Obala, 2. Alar, 3. Amet, 4. Sentep,	
11. Raratep, 14. Mait, 17. Pila,		7. Pila, 9. Ait, 10. Atep, 11. Renlok,	
18. Entsü, 19. Jakrep.		12. Rom, 13. Atsük, 15. Asep, 16. Teti.	



**TANÜBO NAI LANGZÜANG**

Q. Koba küm Janani Suraksha Yojana (JSY) tenzük ?  
 A. 2006      B. 2005      C. 2004      D. 2003  
 \_\_\_\_\_ (Taruba adok nung onoki langzüsü)  
**YASHI ADOK TELANGZÜBA : 2015**

**AO OSHI ANGAZÜKDAK:**

**TANÜ ANGAZÜKTSÜBA OJANG**

**Chiket**

(adj) Tali chiyongba agi yiraa akümba (obese)  
 \* Pai temo aketba chiyongtsü tali achiba agi chiket.



**Chikok**

(n) Aonpo nungi aon khentetba oset (curry spoon)  
 \* Akhi tsüraburtemibo aou aser süngküm agi yangluba chikok dang amshi.

**NAI-A YA METETTER MA?**

**MAY 2021' ITA TONGTIBANG ANOGO KAR:**

- 1 May - Workers' Day (International Labour Day), Maharashtra Day
- 2 May - (1st Sunday): World Laughter Day
- 3 May - Press Freedom Day
- 4 May - Coal Miners' Day; International Firefighters Day
- 4 May - (1st Tuesday): World Asthma Day
- 7 May - World Athletics Day
- 8 May - World Red Cross Day; World Thalassaemia Day
- 9 May - (2nd Sunday): Mother's Day
- 11 May - National Technology Day
- 12 May - International Nurses Day
- 15 May - International Day of the Family
- 17 May - World Telecommunication Day; World Hypertension Day
- 18 May - World AIDS Vaccine Day; International Museum Day
- 21 May - National Anti-Terrorism Day
- 22 May - International Day for Biological Diversity
- 24 May - Commonwealth Day
- 26 May - Buddha Jayanti
- 31 May - Anti-tobacco Day

**SUDOKU # 5841**

5	3	2	7	1	8	9	4	6
6	4	9	3	5	2	8	7	1
1	8	7	4	9	6	2	3	5
2	9	6	8	7	5	4	1	3
8	7	3	1	2	4	6	5	9
4	1	5	9	6	3	7	2	8
7	5	4	6	3	9	1	8	2
3	6	1	2	8	7	5	9	4
9	2	8	5	4	1	3	6	7

**TELANGZÜBA # 5842**

1	6	8	4	5	7	9	3	2
7	5	9	1	3	2	8	4	6
2	4	3	6	8	9	1	7	5
5	3	6	8	7	1	4	2	9
9	7	2	5	4	3	6	1	8
8	1	4	2	9	6	3	5	7
3	8	5	9	2	4	7	6	1
6	2	7	3	1	8	5	9	4
4	9	1	7	6	5	2	8	3

**OJANG LUTEP # 5384**

ANTG	:	□	□	□	□									
AAM	:	□	□	□	□									
STNAE	:	□	□	□	□	□								
UNJGDTMAAANG	:	□	□	□	□	□	□	□	□	□	□	□	□	□
SNEA	:	□	□	□	□	□	□							
SSAA	:	□	□	□	□	□	□							
LITA	:	□	□	□	□	□	□							
AÜMDNKGA	:	□	□	□	□	□	□	□	□	□	□			
SLIATÜ	:	□	□	□	□	□	□	□	□					
NRÜKNGDAE	:	□	□	□	□	□	□	□	□	□	□			

**OJANG LUTEP TELANGZÜBA # 5383**

TANGATETEP TEMEIMTEP TEJUNGNETEP TEYARITEP TESENDAKTEP  
 TONGTEPRATEP TEPALETEP TEJASHITEP MEJUNGTEP MEJEPTTEP

**TAN HOPTA ATEMA - KOMA SÜLA ?**

Q. Covid-19 tashidak wara agi senzüsenpong aser lokti senden senteptsü mesademi akümba mapang ya arogo ajak nung aonung shia online Bible Study (Lai bushiba mapang) sentong ka tenzük nunga koma süla ?



April 30, 2021 nü Patiala nung Punjab Chief Minister, Captain Amarinder Singh'er ki anasa Kissan Sangharsh Committee züngsemtemi Punjab sorkar anema longkak aيتدang police-i parnok nokdangba noksa nung angur.

### Coronavirus wara anema sorkar longjemmer inyakdar: PM Modi

**New Delhi, Rongchii/April 30 (Agencies):** Hokolbarnü Ato kilonser, Narendra Modi-i, linük nung coronavirus tensa tamajungba akümba nokdangtsü atema sorkar kongsang ajak longjemmer kanga mazüngi inyakdar, ta metetdaksü.

India nung coronavirus tensa atema o lemteptsü asoshi Council of ministers den senden amenba mapang nung Ato kilonseri minister tem dang peipei region nung nüburtem den tongtepratepa alitsüla, ta tuyu.

Modi-isa local level nung tebilemtsü onük balala jangjaba sülen iba atemaji inyaktsüla ta tuyuogo, ta Information & Broadcasting ministry-i sangdong ka ajanga

metetdaksü. Minister temisa tesüiba ita 14 tsüngda Centre sorkar, state sorkartem aser nüburtemi inyaka arubatem asadanga liasü.

Minister temi, tang coronavirus wara ya tesüiba küm 100 tsüngda wara tamajungba lir aser iba ya alima atema tayongzükba tuluka lir, ta bangjema liasü.

Senden nungsa minister tem aser Ato kilonseri hospital nung yipten aser PSA oxygen facilities acahaayangba maparen aser sensakertem nem senotsü teyari agütsüba dak sendakba nung Centre sorkar o state sorkartem na tsüngda amalitepa inyakba jenjang asadanga liasü.

India-i coronavirus vaccine

ana takok ngua yanglutetogo aser ano vaccine aika tang tetendangdak lir.

Tang tashi nung linük nung nisung crore 15 dak tema nem vaccine agütsüogo, ta Information & Broadcasting ministry sangdong ajangasa metetdaksü.

Council of ministers-isa linük nung nüburtemi mask agütsü, nisung tsüngda tetsüngda itta alitsü aser teka metsükba densema coronavirus anema tetuyuba balala shidak bentshitsu nüngdak, ta bangjema liasü.

Wara anema tongbang akoktsü atema loktii shilem agütsüji kanga tongtibang, aser mapang ka nungbo linüki iba tongbang madak takok angütsü, ta minister temi bangjem.

### India nung ano nisung lakh 3.86 dak Covid putet aser 3,498 asü

**New Delhi, Rongchii/April 30 (Agencies):** Tesüiba ghonda 24 tsüngda India linük nung ano nisung lakh 3.86 tema dak coronavirus tashidak putetogo; tesüiba anogo asemnü tashi anogo shia linük nung nisung lakh 3 tema dak iba tashidak puteta arudar, ta Hokolbarnü Union health ministry data ajanga metetdaksü.

Hokolbarnü nisung 386,452 dak coronavirus putetba sülen tang tashi nung India nung coronavirus case ajak agi 1,87,62,976 jungogo, ta Health Ministry-i metetdaksü.

Tang linük nung coronavirus agi teshirangdakpur 31,70,228 lir, aser ibaji caseload nungi shilem lir; linük nung iba tashidak agi shiranger anepba shilem tajemba küma 81.99% dang kümogo.

Tesüiba ghonda 24 tsüngda nungsa linük nung iba tashidak agi shiranger 3,498 asü aser tanü tashi nung iba tashidak agi asür ajak agi 2,08,330 jungogo, ta Hokolbarnep 8:00 ako nung health ministry data ajanga metetdaksü.

April 19 tashi nung India nung nisung crore 15 nem

vaccine agütsüogo. ICMR-i ashiba agi, April 29 tashi nung samples ajak agi 28,63,92,086 tendangogo aser iba nungji Brihostibarnü samples 19,20,107 tendangba densema lir.

Tesüiba ghonda 24 tsüngda iba tashidak agi asür 3,498 nungji Maharashtra nung nisung 771 asüba, Delhi nung 395, Uttar Pradesh nung 295, Karnataka nung 270, Chhattisgarh nung 251, Gujarat nung 180, Rajasthan nung 158, Jharkhand nung 148, Punjab nung 137 aser Tamil Nadu nung nisung 107 asüba densema lir.



Srinagar, April 30, 2021: Coronavirus prokba nokdangtsü atema Jammu & Kashmir adminstration-i district 20 nungi 11 ghonda 84 shibangba ajanga Srinagar yimti azüngmeyaka aliba noksa nung angur. Tesüiba ghonda 24 tsüngda Jammu & Kashmir nung nisung 3,474 dak coronavirus putet aser nisung 17 süogo.

### West Bengal nung BJP-i takok ngua sorkar akümtsü: Sayantan Basu

**Kolkata, Rongchii/April 30 (Agencies):** West Bengal assembly election nung chief minister, Mamata Banerjee-i aniba TMC-i takok angütsü, ta exit poll balala ajanga asadangtetogo, ajisüaka West Bengal nung BJP-i exit poll ajanga asadangtetbaji mezüngshir, ta shia BJP lenir kati, coronavirus wara liaka nisungtemi temelenshi aginüa (sorkar melenshinüa) kanga longsoa vote agütsüogo, ta metetdaksü.

Exit polls sangdongba sülen Bengal BJP general secretary, Sayantan Basu-i, "Ano anogo ana ataa liang. Bengal nung BJP-i majority melamela angütsü," ta ashi.

State nung BJP lenirtemisa, exit polls osang balala nung assembly menden sasep nung tetsüngdaji menden 50 dak tema liasü, iba tetezü iba nungji aibelen lir, ta ashi.

BJP otongdar, Sisir Bajoria-i, "BJP-i majority melamela ngua takok angütsü. Ni exit

poll osangtemji mamanger, kechiyong BJP nem agütsüba menden timtiba nungi ishitiba na tsüngdaji ongdang tulu keta lir. Ibaji ajanga exit poll nung aibelen aliba kuli dang sayur. Nütsüng aika aliba state ka nung nütsüng ishika sasep nung asadanga ajanga junga masadangtetsü," ta ashi.

Coronavirus wara ajanga timtem agütsü asü?, ta asüngdanga langzüdang Sisiri, "Iba wara ajanga BJP aser Trinamool Congress naprongla kongshio. Wara liaka Bengal nung nisung aikati vote agütsüba ajanga nüburtemi temelenshi aginüba kuli sayuogo," ta ashi.

Brihostibar aonung ABP-C-Voter exit poll survey ajanga TMC-i state nung assembly menden 152-164 tashi nung takok angütsü ta asadangtetogo.

Iba dak alia ETG Research, P-MARQ, CNN News18 aser Republic TV-CNX polls ajanga-a TMC-i takok angütsü ta asadangtetogo.



April 30, 2021 nü Mumbai nung security sepaitemi COVID-19 vaccination centre tazüng ka anükba noksa nung angur. Brihanmumbai Municipal Corporation (BMC)-i Mumbai nung anogo asemnü tashi coronavirus vaccine magütsüta ta metetdaksüogo.

### Vaccine magütsütetra Health Minister-i anentsü asü?: P Chidambaram

**New Delhi, April 30 (Agencies):** Congress lenir tain aser taoba mapang Union Finance Minister, P Chidambaram-i, May 1 nü Health Minister Harsh Vardhan tendangtsü, iba anogo nungji arrshi küm 18 ser temapurtem vaccine agütsü atema maangka agütsür, anungji vaccine magütsütetra Health Minister-i pa menden toktsütsü asü, ta asüngdang.

P Chidambaram-isa, May 1 nungi tenzüka arrshi küm 18 ser temapurtem nem vaccine agütsütsü atema state tem renema mali, ta shia pai, "May 1 nü Health Minister Dr Harsh Vardhan tendangtsü," ta ashi.

"Pa (Health Minister) aser par sorkaribo state tem ket nung vaccine peria rizünga lir, ta jembir, ajisüaka ibaji yazü ta jungkai adoktsü," ta pai twitter ajanga metetdaksü.

"Arrshi küm 18-44 nütsüng nem vaccine agütsütsü atema state ka danga renema mali

amai reprangteter. CoWin app-ia teyari magütsür," ta pai ashi.

"May 1 nü vaccine maliba agi nisungtem nem vaccine magütsüi vaccination centres nungi meyipa yokra Health Minister-i anentsü asü?," ta Chidambaram-i asüngdang.

Congress Party-i Centre sorkar dang, Centre dang vaccine ayokba kasa jenjangji state tem danga meshitsüla, ta takhangba agüja arudar.

Opposition party-isa, Centre sorkar vaccination inyakyim nung bendangshidang lir, linük nung coronavirus vaccine jenjangji kasa dang asütsüla, ta ashi.

Congress densema aliba sorkar mesüra Congress sorkar aliba state kar nungbo May 1 nungi vaccine agütsütsüsa renema mali, kechiyong sorkar ket nung vaccine mali.

Centre sorkari, state temi vaccine yanglurtem dang nungi indang-indanga vaccine alizüktsüla, ta shio, saka state karibo ibaji ashishir.

# Israel benjong ka nung nisung 44 ajemset, 150 shi yiru



Israel north tsütsü Mount Meron nung Yihuda nung Lag BaOmer benjong amungba mapang ajemsetba nisung tasümang müketa Israel sepai aser tekumzükertem nokdaka aliba noksa ka yangi angur. Iba benjong nung nisung 44 ajemset, ta Israeli ambulance service director-i ashi.

**Jerusalem, Rongchii/April 30 (Agencies):** Israel north tsütsü Hokulbarnü Orthodox Jews benjong ka nung nisung meyririjang aoka adenshia nungtepba mapang nisung 44 ajemset aser 150 shi yiru, ta medical ketdangsürtemi ashi.

Israeli emergency service, Magen David Adom ajanga ashiba agi, Hokulbarnep iba benjong agiba mapang nisung 44 ajemset, MDA ajanga yirur aliba nisung ter dak tema takum kumzüksü meranger aser timtem ajuru alir ajunga manitet tashi maneni inyaktsü.

Magen David Adom indang odongtar Zaki Heller-i ashiba

agi, mozüki nung alir nisung 150 nungi nisung trok kangasa mejungi yirur lir.

Social media nung Ato Kilonser Benjamin Netanyahu-i ibai lendong tuluka lir aser yirur alirtem asoshi ajaki sarasademtsür, ta

Lendong atalokba tesemi Netanyahu Hokulbarnü arua liasü aser lendong atalokba tesem sema jaja.

Nüngtugu Rabbi Shimon Bar Yochai anasa Mount Meron nung ultra-Orthodox Jews nungter timba sür nisung meyririjang aoka Lag BaOmer benjong küm nung khen alidak shilem agiba mapang iba

lendong timtem ya ataloka liasü.

Iba tesem nungi nisung aika longpok ama lenmang temesü ka ajanga tugotsü merangba mapang lendong ya tenzük, ta tenük kuli alirtemi ashi. Merang agi yangluba stairs tanüla nungi ayazüka aluba mapang nisung ka madak ka alua tsük, ta ashi.

"Kinük ka len nisung ajunga nungtepa ao aser lendong ya atalok," ta nisung kati Israel Army Radio dang ashi. Pai iba lendong atalokba indang rasaa ashiba mapang, tejaklen alirtem alang, ta ashi. Pa item sülen nokdaka liasü aser pa asütsü amai bilema liasü, ta ashi.

Israel public broadcasting,

Kan ajanga social media nung video ka prokshiba nung temeshi aini aor telok tuluba lenmang temesü ka nung nungtepa liasü.

United Hatzalah nungi iba lendong nung mezüing yariteper Yehuda Gottleib-i ashiba agi, nisung aika alanga aliba tema nung ano aika tsük.

"Nisung aika dak ajem aser süchia ao,"

Ali nung nisung tasümang aika plastic agi aleper aliba noksa kar Israel nung media balala nung prokshia liasü.

Iba tesem nungi yirur alirtem anitetsü asoshi emergency services ajanga helicopter trok yoka liasü. Yirur alir ya kar military helicopter nung Tel Aviv aser Jerusalem-i anir ao, ta ketdangsürtemi ashi.

Ketdangsürtemi iba tesem nung nisung 10,000 adenshitsu mela, saka sentong ayongertemi ashiba agi, linük tesem balala nungi bus 650 dak tema nung temeshi aini aor nisung 30,000 shi Mount Meron-i anir aru.

Iba tesem nung nisung ya 100,000 dak tema adenshia liasü ta osang balala ajanga ashir, ta northern Israel nungi osangbener Harry Fawcett-i ashi.

"Iba tamangba yimsü sentong nung nisung aika adenshiba ya mamangla masü...aser video balala nunga yamaji angur," ta pai ashi.

Iba tesem nung adenshia alir ya shilem pezü kuma lemsar

shilem ka shi ayong ayonga benjong agitetsüsa liasü, saka nisung onsara adenshi, ta Hatzalah rescue service nung director Eli Beer-i Army radio station dang ashi.

Iba benjong azüoktsü atema police 5,000 shi yoka liasü, koba coronavirus tashidak wara agi tesem ajunga sünga aliba mapang nütsüing timtiba adenshiba sentong ka liasü.

COVID-19 tashidak tali prokshia modaktsütsü mechi health ketdangsürtemi tekumdangtsü shiaka tejangra tulu nung nüburtem adenshi.

Sentong ayongzükter temi loudhailer ajanga nüburtem dang iba tesem nungi senshitsu ayimoktsüba mapang nisung ya ajemset, ta yangji adener kati ashi.

"Temolunglemtsü maliba talep ka nung bomb alitsü südi ta onoki bilem. Yamai ataloktsü shingai bilema meliasü. Pelateper tem mangyimer akum, tesangwa tulu tammang akum," ta temeshi ainlen jajar Yitzhak-i Channel 12 TV dang ashi.

United Hatzalah volunteer rescue service nungi Lazar Hyman-i osangbener dang ashiba agi, "Ni ajangshiba lendong rongnung ibai tamajungtiba lir. Emergency medicine wadang nung ni densemba sülen iba ama ni kodanga mongudang," ta pai ashi.

## Zulu chubatsür

### Mantfombi Dlamini süogo



**Nongoma, Rongchii/April 30 (Agencies):** South Africa nung Zulu chuba yimli ajanga par yimsüsür kumer ita ka lir Queen Shiyiwe Mantfombi Dlamini Zulu asüba osang sangdongogo.

Arishi küm 65 tain Queen Mantfombi ya taoba ita la kinungbu King Goodwill Zwelithini asüba sülen linük nung ethnic kin tulutiba madak khen atema lenir akum.

La asüba ajanga lar kibong kanga aoksa aser tejashi nung lir, ta chubatsü indang ato kilonseri ashi.

Nütsüing yongsük million 11 aliba linük nung temelen yimsüsür ano meshim.

"Her Majesty Queen Shiyiwe Mantfombi Dlamini Zulu, Regent of the Zulu Nation meimlai asüba osang Royal Family ajanga jashiseta aser süngmangseta sangdonger," ta ato kilonser Prince Mangosuthu Buthelezi-i sangdong ka nung ashi.

Yimsüsür temelen shiba mapang chubar kinungertem tsüngta mepetmesü timtem ajurutsü ako, ta ashir.

Iba yimli nung yimtenren tashi mali aser South Africa nung yimsüsür mapa ya timba benjong-bentsü atema dang lir, saka küm shia parnok atema sorkari sen million \$4.9 dak yema lemsüktsür.

Mejangjaba tashidak agi menepba sülen Queen Mantfombi ya hopta ka tejakdang mozü kidangi anir ao, ta South Africa nung osangbener temi ashi.

La kinungbu arishi küm 72 tain King Zwethilini ya mozüki nung diabetes dak sendakba timtem agi asüba sülen March 24 nü la nem yimsüsür menden agüja liasü.

Pai linük nung küm 50 jungnüa yimsü süa arur Africa nung talangtiba yimsüsür akum.

Chuba indang kinungtsütem rongnung Queen MaDlamini Zulu ya jenjang tematiba nung liasü.

La ya Eswatini chuba Mswati III tenu liasü.

Queen MaDlamini Zulu aser asür Zwethilini na tanur ti lir, aser item rongnung jabaso pongu lir.

Tena jabaso tambusang arishi küm 47 tain Prince Misuzulu ya chuba menden nung amentsü akok, ta osangtem ajanga ashir.

## Tzü mechi Kyrgyzstan aser Tajikistan tsüngta rarar

**Bishkek, Rongchii/April 30 (Agencies):** Kyrgyzstan-Tajikistan arrtsü nung tzü mechi mangatetep adoka raratepba nung nisung tajemba agi 13 asü, aika yiru aser ano nisung 10,000 shi iba tesem nungi ainzükter aotsüsa akum.

Tzü agütsüba tesem nung surveillance camera tem inokba sülen Bodhbarnü telok anatsü nungi kati ka dak long agi ontepa mangatetep ya tenzük.

Iba tesem nungi sepaitem anizükter aotsü aser rara anentsü atema tezüngzüktep agia liasü, saka prangbong ola maneni angashir. Asü-amartem ya Kyrgyz tsütsü nungi lir aser Tajik tsütsü nungibo osang mali.

Iba lendong nung nisung ter asü aser 90 yiru, ta yangji aliba osangbener temi ashi.

Social media nung noksa kar prokshiba nunga ki kar nung mi jangrua aliba nguogo.

Mangatetep aliba tesem ya Kyrgyzstan nung Batken region kübok lir. Asürtem rongnung tetsür chanu ka dena liasü, ta Kyrgyz ketdangsürtemi ashi.

Batken indang governor-i ashiba agi, telok anatsüi water surveillance equipment ya intoktsüla ta pangjemtep, saka iba sülen Tajikistan-i memolung.

Iba mangatetep nung arrtsü anükertemi shilem agi, ta osangtem ajanga ashir.

Brehostibarnü anatsü nungi

mitkartemi injang khaloktsü, saka kasa anogo ceasefire sangdong aser mitkartem pei alidaki meyipa ao.

Aonunga injang khaloktsütepa liasü saka kanga sashiabo masü, ta Batken nungi police ketdangsür kati osangbener dang telephone ajanga ashi.

Tesem anatsülen mitkar aser civilian tsüngta injang khaloktsütepa liasü, ta pai ashi.

Kyrgyz-Tajik arrtsü junga sadanga maliba mechi Soviet Union yimli laor 1991 küm nüjiso anguba sülen linük ana tsüngta aiben rara arur.

Hokulbarnü Tajikistan ajanga ceasefire aliba indang osang ka sangdonga liasü.



Prague, Czech Republic nung nüburtem longkak aitsü adenshiba mapang social distancing yimya amshitsü merangba noksa ka yangi angur. Czech nungter nok-o-nü ayuba tesem tuluka poksaba nung Russia nungter itdangter densema lir ta aitsüba ken o nung Czech Republic Tir Milos Zeman-i Russia bukuma nokdakba mechi nüburtemi pa aija linük yimtiba nung longkak aita liasü.

# NMC Kohima Chapter team tasen melenoktsüba sentong agiogo



Kohima, Rongchii/April 30, 2021: Kohima nung NMC Kohima Chapter indang team tasenpur melenoktsüba sentong agir sülen tangokba noksa ka yangi angur.

**Kohima, Rongchii/April 30, 2021 (TYO):** Hokolbarnü (30.04.2021) Crescent International Hotel, Kohima nung Nagaland Motorcycle Club (NMC) Kohima Chapter indang team tasenpur melenoktsüba sentong agia liasü.

NMC Kohima Chapter indang team tasen nung president ji Peter Rutsa alitsü. Kasa team nung vice president- Medo Makritsu, Secretary- Rokovor Vihienuo,

joint secretary- Suneper Langur, PRO- Daniel Metha, I & PR- Atsase Anar, property secretary- Atuo Mezhu aser treasurer- Khriebu Nakhro nung dena lir.

Iba sentong nung NMC Kohima Chapter president mapa toktüsang Zhatuo Rutsa menden liasü. Kasa mapang taoba NMC Kohima Chapter secretary Medo Makritsu-i NMC Kohima Chapter indang inyakyimtem metetdakja liasü.

Iba sülen treasurer mapa toktüsang Rajesh-i telok dang report metetdaksü.

Nagaland Motorcycle Club (NMC) Kohima Chapter indang team tasenpur melenoktsüba sentong nung Tsüngremer temoatsü meshizüka Dr. Tali Imsong-i sarasademtsü. Vice president mapa toktüsang Vike Suohu-i tepela anküp o jembu, ta sangdong ka ajanga metetdaksü.

# Tepela Lemsatper



ASO :  
26.3.1983

ASÜ :  
22.4.2021

Onoki teti meima aliba Obala **Mr. Lanuangshi Pongen** (Longsa) shirangba mapang nungi tenzüka tasüba anogo tashi yimer aser medemer kiyonger shirnokisa tamang rongsen aser nübo agi yariogo, nenok ajak dang kinungertemi kanga pelaba lemsateper.

Onok nenok dangi tsüngdong arua meshitetaka asen teyanglur Tsüngremeri nenok taküm aser kibong temoatsü lidakjang ta ozüi sarasademer.

~ Temeim Kinungtsü, Jabaso, Kinunger aser Anükapang.

# NETTEC COMPUTERS

is launching

**ONLINE** computer courses on Basics and Diploma courses in its centers at Kohima and Mokochung. For details please visit :

**Keditsu Building**  
P.R. Hill Junction  
Kohima, Nagaland  
(0370) 2950325

**Tongpok Mansion**  
Aongza Ward  
Mokokchung, Nagaland  
7005590386

# COVID-19 : Peren DTF senden menogo

**Peren, Rongchii April 30, 2021 (TYO):** State nung Covid-19 tashidak puteter timba küma aoba asadangteta aser District nung iba wara prokba nokdangtsü asoshi nungdakba meratem agitsü atema, Hokolbarnü (30.04.2021) DC Peren, Sentiwapang Aier, NCS lenisüba kübok DC Conference Hall nung Peren District Task Force (DTF) on COVID-19 senden agiogo.

Iba senden nung DSO, Dr. D.K-i telok dang, Home Department ajanga returnees' aser senzüsibongger tem atema SOP tetuyuba tasentem aser kidang quarantine asütsü atema temzüng tasen latettsüba indang metetdakja liasü.

State Sorkar ajanga public

transportation services/ passenger garitem senzüsibongtsü asoshi agütsüba tetuyubatem dak sendakba nung, Board-i passenger tasazük shilem 50% dang melatsü aser Covid-19 tetuyuba nung senzüsibongger ajaki anidaktsü asoshi bangjemtep.

Kasa mapang, board-isa passenger tem taa timba kümtsütsü lemtet aser iba dak sendakba nung Taxi Association den jembiteptsü asoshi ADC Jalukie nem mapa nunglokja liasü. Tekülemdak SOP nung anidaka nisung shilem 30% dang melatsü asoshi board-i lemtetogo.

Peren District nung returnees/senzüsibongger tem

tim tekolakpur temelaba magii arudaktsütsü/aidaktsütsü dak sendakba nung, teloki Village councils/Urban local tentet tem dang pei pei tesemi arur returnees' tasentem jangjatsü aser iba den külemi parnok aruba osang DTF dang metetdaksütsü asoshi tetuyuba agütsüogo.

Check-Gate tem nung senzüsibongger tem mittsü aser parnok indang record junga ayutsü asoshi police dang ashitsü asoshi board-i Additional SP dang mepishiogo.

Village Task Force/Ward Task Force amenoktsü aser akokba tashi DTF/SDTF yaritsü asoshi Village/ Ward tekolakpurtem dang tanaben metetdaksütsü board-isa lemtet.

Maneni, kasa senden nung DIO Peren, Dr. Kiholi-i Peren District nung COVID-19 Vaccination maparen osang agütsüdang, lai, tanü tashi nung dose 6,734 agütsüogo aser tang Covid-19 vaccine dose 7,490 anünga lir, ta metetdaksü.

# Jason Statham-i Fast & Furious movie nung shilem aginer

**Rongchii/April 30, 2021 (Agencies):** Jason Statham-i, 'Fast & Furious' franchise nung tatembangbuba film ana nung Deckard Shaw indang shilem maneni aginüba lemsatepogo.

Arishi küm 55 tain actor shibai iba series nung movie asem aser spin-off 'Hobbs & Shaw' nung Deckard Shaw shilem agiogo, pa 'F9' nungbo matoktsü, saka pai film 11 buba sülen franchise meshibang tsüngda director Justin Lin den inyaknüba lemsatepogo.

Jason-i Collider dang ashiba agi, "Ni tanungba movie ana nung shilem agitsü atema meyipa aruner."

"Ni Justin Lin kanga junga meteta lir aser tememenütsükaji ni F6 nung cameo ama aruba mapang pa director liasü saka 7 aser 8 nung shilem agiba mapang pai shilem magi, anungji küna longjemer langka tulu ka inyaktü tija lir," ta pai ashi.

'Snatch' nung tongti shilem

agisangisa, "Vin Diesel aser tanga characters tem den inyaktü jangrademtsüka. Iba movie nung shilem agiba mapang medemer tajung aika yimtetogo aser ni iba film yaa kanga mimer. Iba film ya takok ngua aotsü langa aliba agi alima ajunga nung takok tajung angur ta bilemer," ta ashi.

"Film nung shilem agitsüji maongka tulu. Anungji parnoki ni taruba film nung shilem agidaktsünüra agitsü," ta paisa ashi.

Kasa mapang nung Jason-i maneni shark thriller 'The Meg' indang tatongtep film nung diver Jonas Taylor indang shilem agitsü renema lir, koba taruba küm nungi yanglu tenzütsü.

"Mapang dang sütepra iba film taruba küm January ita nungi tangok tenzütsü. Ben Wheatley-i iba film direct asütsü aser pa den külemi inyaktü yongyaa atar," ta pai ashi.

# Minister Along-i Ekonhung Patton asüba atema mangyim lemsatep

**Dimapur, Rongchii/April 30, 2021 (TYO):** Lennir tajung aser tetemsü, Ekonhung Patton tanep iba akümli nungi pilaba osang angashia ni jashia mangyimer, ta Hokolbarnü State President BJP Nagaland, Minister Imna Along-i sangdong ka ajanga lemsatep.

"Ekonhung Patton ya nisung tajung ka liasü. Pa ya tangatetba tajung aliba lenir ka aser ochishir ka liasü. Pa dak ochi, tongmelang aser ajemalua shisatsü liasü. Pa ama nisung tajung ka metetba atema pelar," ta paisa metetdaksü.

"Tesüiba küm ishika pa den külemi inyaksema arudang, pa

ya lennir tajung ka ta ni metet. BJP Mandal President ka ama 40th Bhandari Assembly Constituency akangshidaktsütsü asoshi pai tongti shilem agia liasü," ta paisa lemsatep.

"Pa ajungbena süadokba ajanga BJP nung tawa tuluka adokdaksüogo, aser pa teti dang menungratsü. BJP Nagaland-i Ekonhung Patton'er adianutem aser temeimertem den mangyim jashi lemsateper. Asür tanela nem teti tatem maka anisüngzüik agüjang, ta onoki sarasademtsür," ta kasa sangdong nung shia lir.

# Wokha nung ki ka shibangtsür

**Wokha, Rongchii/April 30, 2021 (TYO):** Covid-19 tashidak prokba azioktsü asoshi tekümdangtsü meratem agia, Deputy Commissioner & Chairman, District Task Force for COVID-19, Wokha, Orenhung Lotha-i, April 30, 2021 nungi tenzüka osang tejangja ka magütsü tashi Tsumang A colony, Wokha nung House No.338 indang Room no.

1,2,3,4,5 & 6 shibangtsü tetuyuba agütsüogo.

Iba tetuyuba dak sendakba nung nisung kari danga aibelenra, IPC indang Section 188 kübok teinyaktsü tim inyakba dak alia, Disaster Management Act 2005 indang Section 51 nungi 60 tashi melaba ama temerenshi tapet agütsütsü, ta DC-isa metetdaksü.



Dimapur, Rongchii/April 30, 2021: Lizo Model yimda menti lu nung FAW (Fall Army Worm) Development (SR) kübok iba yimtsüng nung Department of Agriculture, Mangkolemba-i awareness campaign ka ayonga agiogo. Iba campaign nung shisalen sayurji, Shri Nungsang A.I liasü. Pai, mechanical aser bio-control agent tem teyari ajanga mezüng yongji 'FAW' yakta azüokadoktsü asoshi aluyimertem dang rasa ashi. Iba sentong nung aluyimer nem legume metsüjang, bio pesticides aser alu nung yokba tanga tsünüsembongtsü tem lema agütsü.

## Terepranger medeni Tokyo Olympics asayatsü akok: Seiko Hashimoto

**Tokyo, Rongchii/April 30, 2021 (Agencies):** Coronavirus wara tenokdangba ajanga anogo atsülangtsür aliba Olympics asayamung ya terepranger medeni asayatsü akok, ta Hokolbarnü iba Games ayongtsü dak sendakba nung teimla kar lemsatepba mapang Tokyo 2020 president Seiko Hashimoto-i ashi.

Taoba mapang Olympic asayar Hashimoto-i ashiba agi, asayamung ayongertemi athlete tem aser Japan nung alir nüburttem iba wara nungi kümzüka ayutsü asoshi inyak nungang iba Games takok ngua asayatetsü aser nüburt asoshi osang tajung asütsü.

Iba Games nung bendanger asayartem marudaktsütsü asoshi tenokdangba agütsür lir; aser tan hopta Japan nung alirtem (terepranger) atema telemtetba agütsü asoshi June ita tashi anogo atsülangja liasü. Japan nung Covid-19 tanaben adokba ajanga Games achaayangertemi item mera agir.

"Tereprangertem (fans) khenyongi dang memelatsü asoshi tensa kati bener arütsütsü akok. Japan nung alirtem aser shilem agütsüpur athlete tem taküm kümzüka yutsütsü mera tajung aginungang asenoki iba asayamung takok ngua ayongtettsü," ta Hashimoto-i ashi.

Japan nung nüburt shilem timba kati iba asayamung anogo atsülangtsü mesüra thitsütsü asoshi mulunga lir; aser tawa iba tensa kanga mejungi akümba asadangteta Tokyo aser iba linük indang tanga tesem nung state of emergency akatsüsa kümogo.

Medical system khuret agi neneter mazüngi aliba mapang ka nung, iba Games atema medical staff nung temulungertem aruagi

yariteptsü mepishiba asoshi, Olympic achaayangertem aitsüogo.

Hashimoto-i ashiba agi, tereprangertem memelaba ajanga medical system nung maparen pungbadaktsütsü akok.

Alima tensa tamajungdang asayamung thitsüba dak alaka, tanga mapang nung iba Games kodanga thija mali aser asayamung ayongertemi iba Games anogo atsülangtsü mesüra thitsütsü asoshi sentong mali.

Nüburttem teimla mesamadaktsütsü asoshi, athlete tem atema mapang shia Covid-19 test achaayanga agiba aser parnok senzusenbongba atakzükja yutsütsü dak sendakba nung ozüng yangluja lir.

Ajisüaka, athlete tem atema quarantine malitsü aser temulungeri dang vaccine agütsü akok. Hashimoto-i ashiba agi, tensa den apet item ozüng tajungba yanglushitsü aser iba Games takok ngua ayongzüktsü asoshi nia khuret tulu bendaki, ta laisa ashi.

Taoba küm iba Games anogo atsülangtsüba mapang, ketdangsurtemi, anogo atsülangtsüba asayamung ya meimchiri iba virus madak takok anguba temaitsü ka sayur ama alitsü, ta shia lir.

Ajisüaka, alima ajunga asungba coronavirus tensa tamajungba küma aoba asadangteta, Hashimoto-i teimla ayutsü aser amalitepa inyaktsü asoshi lemsatep.

"Alimar tensa komaka mejungi aküm yongjia iba Games takok ngua asayatetra iba jagi asenok longjemba sayutsü. Tang ama mapang asenok longema lir ta alima dang sayutetsü akok," ta lai ashi.

Covid-19 wara agi kongshia alir tanga linük aika den medemdangra, Japan nung lockdown takang maliyongjia iba linük nung wara puteter kangarabo meliasü aser iba tashidak ajanga nisung 10,000 dak tema dang asü.

Ajisüaka, tawa iba wara tanaben adokba ajanga Olympic dak sendakba renemshiba asayamung aser qualifier tem melenshütsüsa aküm; aser iba den külemi linük kübok tesem kar nungbo torch relay ya tesem tezülen ang agiogo.

"Iba asayamung takok ngua agütsü asoshi organising committee-i nungdakba meratem agia asalentong yangludat," ta lai ashi.

Iba wara süshia maoyongjia aser nüburttemi memulung yongjia Olympic ketdangsurtemi iba Games ayongzüktsü asoshi temulungtetba tulu lir aser Hashimoto-i ashiba agi, iba Games asayatsü asoshi nüburti mulungsoa agizükdaktsüner."

"Iba Games atema mera tajung agia renemshitsü kü nükjidong lir," ta lai shisem.

Arishi küm 56 tain Hashimoto ya taoba mapang athlete ka lir, shibai speed skating nung aser sprint cyclist ama winter aser summer Games tenet nung atonga shilem agiogo.

Taoba mapang Japan Ato Kilonser aser Tokyo 2020 indang taoba president Yoshiro Mori-i tetsür o tebur na bendanga jembiba ken o nung pa mapa nungi anentsüba sülen, February ita Hashimoto-i Tokyo 2020 president ama mapa agizük.

Taoba mapang la ya Olympic minister ka liasü aser cabinet nunga tetsür ana rongnung la ka liasü.

## Covid-19 agi shiranger yaritsü asoshi Jaydev-i tenlatsü

**New Delhi, Rongchii/April 30, 2021 (Agencies):** Rajasthan Royals nungi fast bowler Jaydev Unadkat-i India nung Covid-19 agi shirangertem yaritsü nükjidong nung, pai pa indang IPL ita sen nungi shilem 10 tenla agütsütsü mulunga lir.

India nung Covid-19 wara tanaben adoka tensa mejungi akümba ajanga iba tashidak agi shirangertem anepalutsü asoshi medical osettsüset kanga nungdaka kümogo.

Gujarat nungi arishi küm 29 tain Jaydev, shiba 2020 IPL auction nung sen cr. 3 agi alizüker sülen Rajasthan Royals-i anik, pai Covid-19 agi shirangertem atema tenlatsü asoshi social media sabang ajanga sangoktsü.

"Nungdakba pur atema medical osettem alitetsüsa kü indang IPL ita sen shilem 10% tenla agütsütsü. Iba tenla ya timtemer tem yaritsü asoshi kinungertemi achaayangtsü," ta pai lemsatep.

India nung Covid-19 tensa

mejungi akümba mapang ka nung medical osettsüset talisa oxygen concentrator, mozü aser yipden peria maliba ajanga timtem adokdaki.

"Tang linük nung nüburt aika timtem daki aser iba jenjang nung ni Cricket asayatetba ya maongka tukuka ama züngshir," ta Unadkat-i ashi.

Covid-19 tensa mejungi aliba mapang ka nung IPL ayongzükba atema nüburt aikati iba sentong aitsüogo.

Unadkat-i "Tangba tensa nung Cricket asayatsü ya tai mesüra shitak ta ni obendang magütsür, saka iba amala mapang ka nung adianu aser medemer dang nungi pilar alitsü ya tasak," ta lemsatep.

Iba wara anema raratsü asoshi tenla agütsütsü aser vaccine agütsü asoshi Unadkat-i nüburt ayongzük.

"Team ka ama asenok ajak ka küma longjemmer iba wara anema raraba den tenla agüja aser kati ka yaritepa lidi," ta pai ashi.

## Nagaland State Level War Room... (Tapak 1 nungi...)

State Level Control Room for COVID-19 ya Chief Secretary indang Conference Hall, Nagaland Civil Secretariat, Kohima nungi inyaktsü aser NSDMA-i nungdakba teyari ajak agütsütsü.

### COVID-19 wara atema State Level War Room core committee züngsemtem:

1. Chief Secretary : Chairman
2. DGP : Member
3. ACS& FC : Member
4. Principal Secretary, H&FW : Member
5. Home Commissioner : Member
6. Principal Secretary, W&H : Member
7. Commissioner, Nagaland : Member
8. Secretary, NSDMA, Home : Member
9. Principal Director, H&FW : Member

### Core committee den yariteptsü atema shimertem:

1. Shanavas, C. Principal Director, School Education.
2. Manoj Kumar, SP (Crime)
3. Sachin Jaiswal, Jt. Secretary, Agriculture.
4. Ajit Kumar Ranjan, Jt. Secretary, H&FW.
5. Hiazu Meru, Jt. Secretary, Home.
6. Dr. Nyan Kikon, SNO, IDSP, H&FW.
7. Johnny Ruangmei, OSD, NSDMA, Home.
8. Er. Namang Sepong Chang, Dy. Secretary to Chief Secretary.
9. T. Lemlila Sangtam, Assistant Commissioner (HQ)
10. Dr. Longri Kichu, Consultant, H&FW.
11. M. Rollan Lotha, coo, NSRLM, RD.
12. Er. Daniel Krocha, Deputy Director, IT&C.
13. Rendemo Shitio, SERO, NSDMA.
14. Er. Yanger Longkumer, Program Officer, IT & C
15. Kozo Lasuh, UDA, School Education.
16. Lumdemo Kikon, UDA, School Education.
17. Kezeneilhou Mhasi, Asstt Program Officer, IT&C
18. Bojivie Kevichu, Technical Asstt, IT&C
19. Kumughato G Chophy, Asstt Program Officer, IT&C
20. Dr. Hinotoli V Sema, Sr. Consultant, NSDMA.

**COVID-19 wara dak sendakba atema +918929407417 (24x7Helpline) mesüra tsünglanglen agüja aliba number den tongteprateptsü akok:**

Nagaland COVID-19 WarRoom  
03702270033 / 03702270010  
Email: warroomnagaland@gmail.com

**State Emergency Operation Centre (SEOC) NSDMA, Home Department.**

0370-2291122/2291120 ; Toll free No. 1070.  
Email: seoc.nsdma@gmail.com

## BILEMDANGANG

"Pei ajangzükndang taküm bendanga agüjadoker alir."

## India sorkari Naga Wako aser Temzüng... (Tapak 1 nungi...)

Iba ama tia ka nung Naga nunger tejakleni moutetsü, ta paisa ashi.

"Naga nunger kija melitetsü aser asenok Naga nunger tsüngda aser kidangertem den tesentaktep tajung ayutsüla. Asenok tesentaktep nung akhümtsübu, temeten, yimjung aser democracy alitsü atema tensa tajung yanglutsüla. Naga nunger tebilemba melentsüla, aibelentem metongshitsüla, tesüba mapang tai inyakba atema kati ka nem tatok agütsütsüla aser alima den liomedema tejakleni aotsüla" ta Minister Tongpang-isa NSF indang omen "Towards harmony" onük nung ajemdaker ayongzük.

### NSFAYONGZÜKER:

Küm 16 tejakdang, kasa tesem nung NSF 21 buba Lokti Mungdang nung Chief Minister Neiphiu Rio-i North East nung dang masü saka linük ajunga nung NSF ya kaketshir telok tajungtiba rongnung ka lir ta ashi, ta paisa ashi.

Iba mapangji CM Rio-i ashibaji shitak liasü, ajisüaka küm

16 sülen pai iba kasa olen jembitsüsa tia ka nung NSF mali. Asenoki tangar dang nungi akhümtsübu mengutetsüsa jenjang ka nung lir. Anungji, NSF-i meyipa repringshitsü nungdaker, ta Tongpang-isa ayongzük.

NSF ya putiotsü odang tentetba mesüra kaketshir lennir kari inyakshangshitsü atema tentetba masü saka lennir kari Pan-Naga kaketshir telok ka alitsüla aser iba ajanga Naga nunger taginübatem atema inyaktsü ta bilema tentetba lir, ta paisa metetdaksü.

"Iba alizüng amaji, NSF-i kaketshirtem atema dang masü saka tebilemtsü ajak atema rongshiba telok ka ama aser nübortem asoshi asalentong balala nung shilem agia arur" ta Tongpang-isa ashi.

NSF tentetba mapang nungi lokti aser yimten dak sendakba onüktem atema tongti süa inyaka arur aser Naga yimten tebilemtsü nunga shilem tajung agiogo, ta paisa shisem.

"Iba tangatetba nung tanü tashi NSF ketdangsä arur, anungji asenoki iba alizüng nungi mepilatsüla. NSF

ketdangpurtemi Naga loktiliba sasep nung dang masü saka asen litsü adener tangartemia metetsüsa mapa inyaktsüla" ta Tongpang-isa ayongzük.

### RIIN YA LISOPUR

#### JANGJATSÜATEMA LIR:

Iba sentong nung Minister Tongpang-i Register of Indigenous Inhabitants of Nagaland (RIIN) indang olen ka jembidang "iba ya Nagaland nung lisopurtem jangjatsü atema lir" ta ashi.

RIIN maparen ajanga Nagaland nung adoption asüba maparen repringshimtsü aser iba ya NSF-i adoption ajanga masü saka azü ajanga Naga nunger ta asüba den kasa lir ta paisa metetdaksü.

RIIN policy shitak yanglutsü aser sensotem pei temeten angutsü atema nisung ajaki tebilembatem lemsateptsüla, ta Tongpang-isa ashi.